

討官沈思孫曰金文鉉弑其父此天地所不容人法所必誅當時臺諫  
 請論如法爭之不得恭愍不足道至今觀史可為痛心在今密陽朴君  
 孝弑父之罪既著故降其邑号以懲其惡不十年而復其號若以為疑  
 獄則當更覈其實明其非罪然後復其號可也 上曰朴君孝之罪大  
 臣議為是府居一道控制之地而至於殘弊且降號至於六七年之久  
 故請復舊號非以君孝之罪為疑獄而然也思孫曰自後世觀之則恐  
 以弑父之罪為輕也一邑之殘弊與夫懲弑父之惡必有輕重 上曰  
 今見高麗史遣子弟入學今古雖異然前亦有是議此美事也思孫曰  
 昔唐太宗時亦令遣子入學但為父母必思其子為入子必思其親此  
 人之常情故今從自願以遣我國自古有此例而近來廢之以矣○臺  
 諫啓前事不見○日暈日上有冠夜東南方有氣如火○辛丑 聽朝  
 啓戶曹判書高荊山曰國人凡有罪而應流者必屬於南海巨濟珍島  
 等三邑而近來多有還逃之弊此關梁之禁不嚴故也況彼人多謫是  
 土若不嚴關梁之禁則彼亦得以逃出其弊不貲臣歷觀三邑水道非  
 舟則決不能渡宜令津夫譏察使不得私自出入可也且此三邑土地  
 綿薄而有限新徙之民不能為生生之業有逃避之患是亦可慮宜令